



Rero omwana omoiseke oiboirwe ase ekenyoro kia Ihithe. Ihithe n'ekenyoro egeke iga getabwati eriogi kere Nyeri ensemu ya Kenya ya gati. Ng'ina omwana are n'omogoko mono.

Abang'ina bande mbarengi ase ekeoreri. Echi n'chinsa chia maambia. Erioki nkororekana rire korwa ase enyomba eyemo. Ching'ondi nchiraire ase ebisieri bisiekire bie chinyoma.

Abang'ina nigo bare n'omogoko. Baretire chindagera ao ao. Baretire ching'ende chimwamu, egesare, ebituma ebisenyente, erongori eng'ineke, obosie bw' ebituma, chinyeni, ebiasi, amatoke amabese n'amatobu amo n'ebinto binde ebinge.






Omwana oyo enyaroka nigo akorokwa Wangari. Eri n'erieta rigiya ri'omwana omosinini nyakieni kemwamu. Akororeka kare n'chinguru. Nigo akona korambora amaboko. Naende nigo akoruta amagoro. Anga buna oyotagete koiruruka.

Ng'ina Wangari nigo are n'omogoko. Ise nere nigo are n'omogoko. Oyo n'omwana obo o gatato. Ne rituko rinene ase omochie obo. Abairi baye, abasani baye amo n'abaamate bachire korora omwana ekeng'werere.



Omoyega omonene inkoba ore omochie oyo. Nigo endagera amo n'ebinto bi okonywa bigochia koba ebinge. Endagera buna Mukimo, enyama ensambe amo n'enkarange ngochi bire korosigwa. Ebinto bi'okonywa buna erongori eng'ineke, echae n'amabere amaruranu nabirobio ingochia koba biroo. Oyo n'omoyega bw'okogokera okoiborwa kwa Wangari ase omochie amo n'ekenyoro. Bonsi ingochi bare goterera omwana amatera amaya.





Wangari akagenderera gokina na kong'ainia. Abanto bonsi b'ekenyo bakamwancha. Naende bakegena buna nonya Nyasae namwanchete. Ekeru arenge emiaka etato, ise akang'anya korwa ekenyo kia Ihithe. Akagenda na Wangari amo na ng'ina. Abanto ba Ihithe bagaichana mono.


Wangari abwate bamura bamwabo babere. Omonene nigo are korokwa Nderitu n'omoke Wambugu. Nderitu na Wambugu bakarera mono rituko ise, Wangari na ng'ina bang'anyete.

Bakaanga kogenda esukuru amatuko abere. Nigo bono bamenyete na sokoro na ng'inakoro. Kende nkeiyo bare gokora otatiga korisia ching'ondi chia sokoro yabo. Rituko ria gatato, sokoro yabo akabairania esukuru ya Ihithe.





Ise Wangari nigo
ang'anyete gochia
Nakuru. Oyo n'omochie
ore Kenya ye rikura.
Enyancha enene
ekorokwa Nakuru nere
ang'e n' omochie oyo
o Nakuru. Enyancha
eye ebwate chinyoni
chinyinge chikorokwa
chikong'a.



Ise Wangari nigo
ang'anyete kogenda
Nakuru ase engecho
y'egasi. Nigo arenge
kogenda gokora egasi ase omogondo omonene o John
Fletcher. Nigo arenge gokama chiombe kera mambia.
Chinsa chia mobaso, nigo arenge kogenda gochirisia.

Wangari bono obeire omoiseke omonene. Oikirie emiaka
etano n'omo. Nigo anchete kobwatia ise kera ekeru
akogenda mogondo. Nigo anchete koboria ise amaswari
amange igoro y'ebimeri. Nigo arenge gotwa amaoga
korwa ase emete oirera ng'ina.





Wangari atagete kogenda esukuru Korende omogondo oyio omonene tobwate sukuru. Ekeru arenge emiaka etano n'ebere ise akamoirania Ihithe amo na ng'ina. Bamura bamwabo bakagoka mono komorora nainde. Bakagoka baka bagasinywa korara obotuko obwo. Wangari akabatebia emegano emenge igoro ya Nakuru. Akabatebia igoro y'ebimeri aroche aroro. Akabatebia igoro ye chiombe chi'amabere, ching'ondi amo n'ebinto binde. Nigo anchete omogondo oyio. Mambia yaye ise akairana Nakuru. Agatiga Wangari na ng'ina Ihithe. Nderitu na Wambugu bakagoka mono kobera inka na Wangari na ng'ina naende.



Ekeru omwaka orange ang'e koera, sokoro yabo akaira omochochoro oye esukuru ya Ihithe. Nderitu na Wambugu bakagoka mono komorora esukuru yabo. Bakamotaria na komoorokia esukuru goeta. Wangari agancha sana emete aroche esukuru eyio.





Wangari akagoka mono kogenda esukuru. Nigo anchete omwarimu oye mono. Omwarimu oye nigo arenge korokwa Mrs. Mutahi. Nigo omwarimu ababundisete amatera amange. Naende akabaganega emegano emenge, Wangari nere akabatebia emegano emenge igoro ya Nakuru. Rinde nigo Wangari arenge korera. Nigo amaiga are komoriera ise. Nigo atagete koirana Nakuru.

Ekeru arenge nchera korwa esukuru nigo arenge korora amaoga amange. Nigo arenge gotwa ayande ochia koorokia ng'inakoro. Ng'inakoro akamoroka omoiseke bw'emetete ase engecho arenge gokwana igoro y'emetete kera engaki.

Ekeru arure esukuru nigo arenge gokonya ng'ina gotenya chinko getii. Nabo naende arenge komokonya gochia roche ase oroche rwa Kagumo kera Chumamosi . Nigo bonsi bare kogenda roche gosibia chianga kera Chumamosi. Nderitu na wambugu nigo barabwo bare goaka otimbu ase ritibo riarenge ang'e n'oroche.





Ekeru Wangari arenge emiaka ikomi n'omo, akairwa esukuru ya amasomo a gati ya St. Cecilia yarenge ase akorokwa Mathari. Mrs. Mutahi, omwarimu oye, akaigwa bobbe mono. Agateba buna Wangari nigo arenge omoiseke omong'aini mono. Nigo arenge koorokereria abana bande amasomo ase bare koba n'obokong'u. Abana arenge gosoma nabarabwo ekerasi ekemo bakarera mono ekero baigwete buna orure esukuru yabo.



Nderitu na Wambugu bagaichana mono. Bono Wangari tarenge nabarabwo esukuru. Wangari tarenge nabarabwo inka. Bagataka bagende nere ase esukuru yaye engeni. Ng'ina akabatebia buna esukuru ya amasomo a gati ya St. Cecilia n'eya abaiseke boka. Naende akabatebia buna aborokigwa b'esukuru eyio nao bakorara.

Bono Wangari tarenge gotara gochia esukuru. Tarenge kogenda mogondo buna arenge kogenda ekero arenge inka. Tarenge kogenda kobucha amache korwa ase oroche rwa Kagumo. Tarenge kogenda gotenya chinko. Bono n'amasomo oka Wangari arenge korengereria.





Ekeru Wangari arenge esukuru, amaiga akamoriera chitaaro chiria arenge kogenda na ise gochia mogondo. Akagania chitaaro chi'okogenda roche. Akagania chitaaro chi'okogenda gotenya chinko. Ekeru chisukuru chiare gosiekwa, nigo arenge kogoka mono koumerana na bamura bamwabo, ng'ina amo na abaamate babo ba Ihithe.



Nyuma y' emiaka ene, Wangari agakoora amasomo a gati ase esukuru ya St.

Cecilia. Nere obete enamba eyemo ase ekerasi kiaye. Naende akagenda gosoma ase esukuru y'abaiseke ya Loreto ere ensemu ya Limuru. Agakora omokia baka agaeta buya.

Wangari akanyora amagisi amaya Kenya engima. Aborokigwa, abarimu amo n'abaibori b'esukuru y'abaiseke ya Loreto bakaba n'ekegokero rituko rigima. Kera omonto ase ekenyoro kia Ihithe agakwana igoro ya Wangari Muta. Kenya engima ekaigwa buna omwana obo aetete amatemwa buya. Akagera kera omonto akagokera ekenyoro kia Ihithe.





Omwaka ore kobwatia
Wangari Muta
akaegwa obokonyi
gochia gosoma
Amerika. Akagenda
ekorechi ya Mount St.
Scholastica ere ase
omochie o Atchison
ore Kansas. Nyuma
y'emiaka ene akanyora
etigiri.



Korwa abwo akagenda
ase eyunibasiti
ya Pittsburgh ase
anyorete etigiri ya kabere. Akagenderera gosomia
abantu igoro y'enchera y'ogotanga ogosareka kw'embeo
y'okoeyana. Nigo arenge koinyoria abantu buna ense
nigo eganeti emete emenge. Ng'inakoro tagosete
komoroka omoiseke bw' emete.

Ekeru airanete Kenya akanyora egasi ase eyunibasiti.
Akagoka gokora egasi n'abantu ao ao. Nyuma y'engaki
gete akaumera na komanya Mwangi Mathai. Oyo nere
omonywomete.





Nyuma ya amatuko amake, omoiseke bw'emetete akanyora omwana. Akaroka omomura oye omotangi Waweru. Bakanyora omwana o kabere omoiseke bakamoroka Wanjira. Waweru akagoka mono gotwara mosubati omwabo. Wangari akagokera enyaroka yaye mono. Amasabo aye nigo arenge buna oyio nere ache koba omoiseke bw'emetete.

Omoiseke nere orenge omokogoti. Akarokwa Muta. Waweru na Wanjira tibare korara. Nigo batagete goikaransa ang'e na mosubati omwabo korwa mambia goika marogoba.

Chingaki echio chionsi nigo Wangari, ng'ina abana aba, arenge goetanana chinsemo ao ao ogosimeka emete. Akarosia chinasari chi'emetete ase ebinyoro ebinge. Akaa abanto omoyo bw'ogosimeka emete. Agatebia abang'ina buna goika basimeke emete nario baranyore ase bagotenya chinko.





Wangari aanchete abana baye mono. Naende nigo aanchete bamura bamwabo mono. Nigo aigwanaine mono n'abasubati bamwabo batato. Akarenta abasubati abwo bamwabo Nairobi. Akabaigorera ebiasara bi'etuka. Bakagoka mono.

Wangari ere akagenderera gosimeka emete. Naende akagenderera na amasomo aye. Akanyora etigiri yaye ya gatato. Mokungu onde taiyo konye osomire buna ere ase orogongo oronene. Bono nigo arenge gosomia ase eyunibasiti.

Aborokigwa bonisi ase eyunibasiti nigo bamomanyete. Nigo abasometie ebinto ebinge. Naende nigo bamwanchete mono. Arenge kobatebia buna korenda emete tikoganetie amasomo. Akabaa emete basimeke ase ebitii amo n'ebioreria bi chinyomba chi'eyunibasiti.





Omiseke bw'emetete bono akaba eburobesa. Kera omonto Kenya engima akamomanya. Akagera abanto bakamanya igoro y'ekeneyoro kia Ihithe. Abanto ba Ihithe nigo barenge gokwana igoro y'omwana obo, Wangari. Erieta riaye nigo riare gokwanwa kera ensemu ya Kenya.

Agachaka chinasari chinyinge chi'emetete Kenya engima. Akaorokereria abang'ina enchera y'ogochora chintetere chi'emetete. Akabatebia buna chintetere chiria chi'emetete bagosimeka nigo chire chintetere chi'omorembe. Amang'ana aye akagera bagachaka korosia chinasari chi'emetete ebinyoro biabo.

Ekeru ki'embura, bagasimeka emete eyio ase emegondo yabo. Bagasimeka emete ase ebitii. Nyuma y'amatuko amake abanto bakanyora chinko chisaine. Bagatwara amakara amange. Kera omonto nigo arenge gotogia Wangari, eburobesa y'emetete.






Abanto bagaonchoreria
ebirengererio biabo
igoro y'ogotema
emete ase eng'echo
ya Burobesa
Wangari. Tatagete
emete y'okoagacha
etemwe. Nigo atagete
omorembe n'ebinto
biria bitoetanaine.
Nigo atagete abanto
bamenye n'omorembe.
Naende nigo atarete
chinse chinyinge ense
engima.



Abanto abange ense engima bakaigwa ekio arenge
gokora. Agatebia abanto igoro y'egasi yaye ase ebinto
biria bitoetanaine. Akarwa chinkwana chinyinge.
Akarika ebitabu ebinge. Abanto b'orogongo rwa bunge
ase ensemu ya Tetu bakamochora koba omobunge obo.
Akaba omokonyi bw'omogwasiri omonene ase ebinto
bitoetanaine na biria bi'obonda bw'ense. Agaika ase
agataka koba omorai bw'ense ya Kenya. Abanto abange
bakamobwata okoboko ase ring'ana eri. Ekemanyererio
kiaye nigo kiarenge omonyanya. Oyo n'omoiseke
bw'emete oria otagete koba omorai bw'ense ya Kenya.





Omoiseke bw'emetete akaegwa ebiegwa ebinge. Abantu nigo bagogetigwe n'egasi yaye goetera ebinto biria bitoetanaine amo na korwanerera omorembe. Nigo atagete obochenu ase biria bitoetanaine ase kera omonto. Rituko erimo Burobesa Wangari akagenda gokwana n'abantu ase egetii. Nigo omobaso obarete rituko erio. Abageni bakaegwa amache y'okonywa arenge ase chichuba. Abageni abwo bagakumia ekero atenenete gokwana.

“Rigereria ingo ase risakara riao ri'ogosiba amache rire,”
Agakira ake.


“Indoche nigo atugutire inse abwo ase moikaransete.
Inang'ainereria?” Burobesa akababoria.

Abageni abwo bakarora obosoku mono. Kera oyomo agachora risakara ri'ogosibera amache amo ne chichuba chiria chiatugutire kera ase.





Obuya obonene bw'omoiseke bw'emetete inchera bwarenge. Eri ne rituko riria Burobesa Wangari Muta Maathai abuate ekeegwa ki'omorembe kia Nobel omwaka bwe chiribu ibere na inye. Nigo aetwe esiko ase okorwanerera ebinto biria bitoetanaine amo n'omorembe. Nere orange omong'ina omotang'ani ase Africa konyora ekeegwa ekio kia Nobel. Akagoka mono. Abakenya bonisi bakagokera ekeegwa ekio. Abanto ba Africa engima bakamogokera. Abarai abange korwa ase chinse ao ao bakamogokera ase okobua ekeegwa ekio



Burobesa Wangari agateba omogano igoro y'enyoni ensinini yakonyete rinani rinene korwa ase omorero. Nere nabo akonyete goetera gosimeka emete emenge. Nigo riarenge rituko ri'ogoichana mono ekero Burobesa Wangari Maathai akwete. Rituko erio nigo riarenge chitariki emerongo ebere na isano omotienyi o kianda omwaka bw'chiribu ibere na ikomi n'emo. Nigo arenge emiaka emerongo etano n'ebere n'oyomo. Esanduki yaye ekaroserigwa ekemunsi amo n'ebirundu. Okogania kwaye nigo kwarenge buna omote onde bwensi tobaisa konachwa korosia esanduku ye chibao y'okomotindeka. Esanduku yaye nigo yatubire n'ebendera ya Kenya.

Omosani oye oyomo agateba, “Onye onde taiyo orachengere omong'ina oyo omonene bw' Africa, emete nabo ekomoakera chinkobi”

Abanto bande nigo bagoteba buna ekero arenge koenigwa aaria Nyeri, omote gete orerete chincherere chi'amariga! Korwa amakweri aye, ebinto ebinge biakorirwe chinse ao ao ase esiko yaye. Aiga Kenya ebara eyemo egoetia chigari chinyine nigo yaonchoretwe erieta korwa Ebara y'rinani ekarokwa ebara ya Burobesa Wangari Maathai.

